

Friday, February 14, 2025

Time - 2:30pm

CADC VC ELECTION

Mizoram State Election Commission chuan Chakma Autonomous District Council huamchhunga Village Council inthlan chu thla leh March ni 12-a neih a nih tur thu an sawi.

Mizoram State Election Commissioner Dr. H Lalthlangliana chuan vawiin khan a pisa-a thuthar thehdarhtute nena inkawmna an neihah he thu hi sawiin vawiin inthlan puan a nih atang hian CADC huamchhungah election model code of conduct kenkawh nghal a nih thu a sawi a, State Election Commissioner chuan CADC hnuai Village Council chhunga In 50 awm chinin VC seat thum an neih thu leh In 50 atanga 100 inkarin seat 5 an neih thute bakah In 101 atanga In 150 in seat 6 leh In 151 atanga a chunglamin seat 7 zel an neih theih thu te a sawi baw.

Mizoram State Election Commission tarlan danin CADC huamchhunga Village Council-a ding turte hming pek luh hun hnukung ber atan tun thla February ni 19 ruat a ni a, hming pek luh te endikna hun atan February ni 21 ruat a nih bakah hming pe lut inhnuk kir duhte tan February ni 24 thleng hun pek an ni a. CADC hnuai Village Council-a vote tla te hi vote thlak ni vekah chhiar fel a ni dawn a, vote thlak that ngai a awm a nih chuan vote thlak tuk March ni 13-ah neih that leh tura ruahman a ni a, March ni 17 a VC tinte inpeih fel vek tura tih an nih bakah a tuk March ni 18-ah VC thlan leh a kaihnawih pawh zo fel vek tura ruahman a ni baw.



CADC VC STATISTICS

Chakma Autonomous District Council hnuai Village Council inthlanna neih turah vote nei thei mi 37,883 an awm.

Mizoram State Election Commission tarlan danin CADC hnuai VC inthlan lo theng tura vote nei theite hi mipa 19,162 leh hmeichhia 18,721 an vaiin mi 37,883 an awm a, chungkua 16,991 awm ang a chhut a ni baw.

CADC huamchhungah hian Village Council seat 88 a awm tih State Election Commission chuan an thuchhuah siamah hian tarlangin hengah hian General seat 428 leh Reserved seat 88 a awm a, CADC hnuai VC seat awm zat chu a vai a belhkhawmin seat 516 a ni tih SEC hotute'n an sawi baw.

CADC huamchhunga Village Council lian ber chu Kamalanagar-I niin hetah hian voter mipa 840, hmeichhia 838, a vai a belhkhawmin mi 1678 an awm a, chungkaw 725 awm ang a chhut a ni baw. Chakma Village Council te ber chu Gobasuri niin hetah hian chungkaw 60 an awm a, voter mipa 58 leh hmeichhia 56 an vaiin 114 an awm a ni.



I&PR MINISTER

Information & Public Relation Minister Dr Vanlalthlana'n tunlai khawvelah awlsam taka thuthar hriat tur awm mahse thudik leh rintlak thliar thiam a pawimawh thu a sawi.

He thu hi vawiina Indian Institute of Mass Communication, MZU-a a tlawhna ah sawiin Minister chuan tunlaiah thuthar awlsam taka hriat tur awm mahse thudik ngaihchan hmasak a pawimawh fo a ti a, thuthar thehdarh kawngah pawh journalist te chu midangte hriattur chhawp chhuah kawngah awn lam neiloa puan chhuah a pawimawh tih a sawi.

Minister chuan IIMC-a zirlaite chu Mizorama an awmchhungin a tam thei ang ber Mizo nunphung a tha lai zir tama, an zirchhuah huna an chhawr tangkai theih tur thlang thiam turin a chah a, Mizorama thuthar thehdarh dan kalhmang hriatchian tum a, midangte kawm tam turin a chah a, MZU campus-a IIMC awmna chu hmun tha tak anih thu sawiin zirlaite tan boruak tha leh thawm bengchhenglo anih bakah azirna atana an mamawh engkim awmna hmun tha tak a ni tih sawiin IIMC hmun dang nena tehkhin pawhin a chhuanawm thu a sawi bawk.

Vawiina hun hmanah hian MZU mi pawimawh hrang hrang leh Doordarshan leh AIR hotu hrang hrang an tel a, heng bakah hian IIMC zirlaite an tel bawk a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Zanin dar 6 leh a chanve-ah Chanchinthar hi puan leh a ni ang.



SEC REVIEW ON LC AND VC ELECTION

Mizoram State Election Commission tarlan danin Local Council leh Village Council inthlan neih zawh takah party malin sorkarna an siam theih lohna hmun 117 a awm.

State Election Commission Secretary Pu K. Laldinglana sawi danin Village Council 554 leh Local Council 110-ah inthlanna hi kalpui a ni a, hetah hian ZPM chuan Local Council leh Village 321-ah sorkarna an siam a, MNF in 149-ah sorkarna siamin Indian National Congress chuan 57 ah an siam bawk, heng bakah hian Independent sorkar siamna hmun 9 a awm bakah BJP sorkar siamna hmun 1 a awm bawk.

